

之事而只付之於唐官擺撥而不遣使臣可乎擺撥傳報必無可疑而亦不可專恃予意文臣不能馳馬擇武臣之年少識字者譯官一同急賫咨文飛報於軍門不可不為更議處之且平安道根本極為關重而我國謀無先定素之遠慮終使右相離於其處蕭相國留守關中之意豈如是乎厥後其處之事多致解弛非復如前日良可嘆也今反覆思之不如以右相還為監司即為發送凡事預為措置議啓且自古雖盡人事必賴神祐感通之理不可誣也我國平時慢蔑鬼神祀享不誠祭物不潔寧有獲其福乎昔者符堅入寇晉祭山川今宜別遣使臣國內山川十分虔誠致祭事議處言于備邊司○夜一更巽方有氣如火移時乃滅○以李璲為穩城府使尹義立為藝文館奉教奇自獻為承政院右承旨○辛丑備邊司啓曰伏見傳教之意則告急軍門其事莫重初因胡應元所言欲以撥報速馳以去然更為專遣使臣告以賊勢甚急先發數千浙兵及期馳到京城以為聲援使賊聞之則有所畏憚而不敢輕進依上